



ՀՈՒՇԱԳԻՐ ՄԵԴԻԱՅԻ ԷԹԻԿԱՅԻ ՆՇԱՆԻ ՎԵՐԱԲԵՐՅԱԼ

Աղվերան, 7 հունիսի, 2025թ.
Լրատվամիջոցների ինքնակարգավորման
նախաձեռնության տարեկան համաժողով

Մենք՝ Լրատվամիջոցների ինքնակարգավորման նախաձեռնությանը մասնակցող ներքոստորագրյալ լրատվամիջոցներս,

Հաշվի առնելով

- հանրության՝ իրազեկ լինելու իրավունքի իրացմանը և էթիկական լրագրության զարգացմանը նպաստելու մեր հանձնառությունը,
- [Հայաստանի լրատվամիջոցների և լրագրողների էթիկական սկզբունքների կանոնագրի](#) դրույթներով առաջնորդվելու մեր պատրաստակամությունը,
- Հայաստանի ԶԼՄ-ների էթիկայի Դիտորդ մարմնի կարևորությունը՝ որպես լրատվամիջոցների ինքնակարգավորման համակարգի կարևոր կառույց,

Ընդունում ենք հետևյալ դրույթները.

1. Մեդիայի էթիկայի նշանի սահմանումը

Մեդիայի էթիկայի նշանն ունի տեսողական արտահայտություն՝ լոգոտիպ, որն ապահովում է ակտիվ հղում դեպի ԶԼՄ-ների էթիկայի Դիտորդ մարմնի կայքէջ (mediaethics.am) և ներկայացնում է լրատվամիջոցի անդամակցությունն Ինքնակարգավորման նախաձեռնությանը:

Էթիկայի նշանը հավաստում է լրատվամիջոցի հանձնառությունը՝ մատուցել Հայաստանի լրատվամիջոցների և լրագրողների էթիկական սկզբունքների կանոնագրին համահունչ՝ ստույգ, անաչառ, բազմակողմանի, որակյալ և պատասխանատու լրատվություն:

2. Էթիկայի նշանի ստացման պայմանները

Էթիկայի նշանը ստանում են այն լրատվամիջոցները, որոնք

- ստորագրել են Հայաստանի լրատվամիջոցների և լրագրողների էթիկական սկզբունքների կանոնագիրը,
- ընդունել են Նախաձեռնության բոլոր վերաբերելի [փաստաթղթերը](#), հետևողականորեն պահպանում են Հայաստանի լրատվամիջոցների և լրագրողների էթիկական սկզբունքների կանոնագրում ամրագրված կանոնները և լրագրողական էթիկային առնչվող խնդիրների լուծման հարցում համագործակցում են ԶԼՄ-ների էթիկայի Դիտորդ մարմնի հետ:

3. Էթիկայի նշանի կիրառման կարգը

Լրատվամիջոցները Էթիկայի նշանը տեղադրում են իրենց կայքէջերում, տպագիր պարբերականներում, ինչպես նաև սոցցանցերի իրենց էջերում՝ այդպիսով ընդգծելով իրենց նվիրվածությունը լրագրողական էթիկայի սկզբունքներին:

4. Հանձնառությունը

Էթիկայի նշանը կրող լրատվամիջոցները

- պահպանում են լրագրողական էթիկայի կանոնները՝ ամրագրված Հայաստանի լրատվամիջոցների և լրագրողների էթիկական սկզբունքների կանոնագրում,
- ընդունում են ([ԴՄ աշխատակարգի](#) նախատեսած դեպքերում՝ հրապարակում են) ՁԼՄ-ների էթիկայի Դիտորդ մարմնի եզրակացությունները, փորձագիտական կարծիքները եւ հայտարարությունները,
- մասնակցում են էթիկական թեմաներով քննարկումներին և վերապատրաստումներին:
- վարում են թափանցիկ գործունեություն:

ՁԼՄ-ների էթիկայի Դիտորդ մարմինը կարող է դադարեցնել Էթիկայի նշանի օգտագործման իրավունքը՝ լրատվամիջոցի կողմից լրագրողական էթիկայի սկզբունքների պարբերական և միտումնավոր խախտման կամ ինքնակարգավորման գործընթացից շարունակաբար հրաժարվելու պարագայում:

5. Միացում հուշագրին

Ինքնակարգավորման նախաձեռնության անդամ լրատվամիջոցները, որոնք չեն մասնակցել 2025թ. համաժողովին, կարող են միանալ սույն հուշագրին՝ լրացնելով միացման ձևաթուղթ և հաստատելով իրենց համաձայնությունը նշված դրույթներին: